

Departamento di Asuntonan Social: Dia Internacional di Famia

ORANJESTAD - Na 1993, Nacionnan Uni a declara 15 di mei e Dia Internacional di Famia. Desde e tempo ey, anualmente ta celebra e dia aki rond mundo. Esaki pa medio di informacion ta scoge pa conscientisa e comunidad riba e diferente temanan cu ta afecta nos famianan. E aña aki e topico ta:

Sigura bidanan sano y promove e bienestar di tur hende di cualkier edad. E aña aki e meta di Nacionnan Uni cu e Dia Internacional di Famia ta pa aumenta e conscientisacion di e rol di famia y maneho pa famianan promoviendo bidanan saludabel pa un futuro sostenibel. Un di e metanan central di e agenda 2030 di Nacionnan

Uni ta e Desaroyo Sostenibel cu ta enfoca riba caba cu pobreza, desaroyo social y e bienestar general di e ser humano, via di proteha su medio ambiente.

Tambe ta pidi pa nos pone hopi atencion ariba e rol di hende homber y e problemanan cu ta pasa di generacion pa generacion

Considerando e bienestar di famianan, den implementacion di e metanan pa logra un Desaroyo Sostenibel, tin un relacion hopi grandi cu e bienestar general di e individuo. Un famia tin un papel importante den e desaroyo di e bida social di cada miembro, dor di cuido, educacion y socialisacion di muchanan y hobennan, sin laga afo nos grandi nan..

Den cuadro di Dia Internacional di famia, Departamento di Asunto Social (DAS) kier pidi atencion special di nos comunidad pa e importancia di "e famia" den bida di nos muchanan. Mayornan y demas educadornan por yuda den e desaroyo y bienestar di e muchanan, via di ta consciente cu nan ta e spiel di influencia (rol model).

Departamento Asunto Social den su trabao diario pa asisti personanan y famianan cu nan pregunta, problema y necesidadnan ta ripara continuamente e importancia cu e "famia" tin pa cada miembro di nos comunidad. Ningun yiu por a scoge e famia cu e a lanta aden! Pa es motibo aki cada miembro di e famia tin e responsabilidad pa

laga otro sinti su mes stima, respeta, protegi y comprende. Investigacionnan internacional ta demostra cu un balans entre famia y trabou a demostra di tin un impacto hopi grandi riba e salud (bienestar fisico y mental) di cada miembro di un famia, specialmente e recien naci nan. Ariba diferente area di bida por promove un bon balansa entre famia y trabou, por pensa pe: orario di trabou flexibel pa mayornan pa aumenta e capacidad pa ta disponibel pa nan yiunan y asina ofrece nan e miho cuido.

Departamento Asunto Social ta contribui diariamente na fortifica e famia y cada miembro formando parti di e famia. Den su trabou diario ta ofrece na su clientenan guia,

terapia y programanan cu e meta pa:

1. Informa nan ki caminda pa cana pa haya ayudo pa diferente problemanan
 2. Sostene/guia e miembronan di famia den nan relacionnan familiar
 3. Sostene/guia mayornan con pa anda/lanta nan yiunan
 4. Sostene/guia mayornan tocante fasenan di desaroyo di nan yiunan
 5. Guia cliente con pa anda cu stress, emocion y trata trauma nan di pasado
- Departamento Asunto Social kier felicita e pueblo di Aruba y su famianan pa sigui duna lo miho cu por na otro, den bienestar di nos comunidad. Famianan funcional ta un reflejo di un comunidad sano! □